

三朝遼事實錄

三朝遼事實錄卷之十一

黎陽王在晉明初父編

男會苾穉薊父較閱

壬戌

九月王在晉題竊惟遼之亡也在于人情之各異

議論之煩多人人面向心違口甜手辣比至壞事以
經撫頂罪而其禍卒貽于封疆職爲此虚心延攬並
無偏枯膠滯之病俾人人各效其能事事必中于窾
若逃官逃將職亦憎之然自全遼屢劾而天下知名
之將多罹惡煞目前卒未得可用之人不得不暫用
入關之將然用其人未嘗盡用其言也即用其言亦
未嘗遽信其人也兵部原未嘗選將發山海關聽用

則所用爲逃將所斥亦爲逃將。用者固未盡公勤而斥者豈盡爲忠計悠悠之談其何可信乎。關上情形數月未能悉窺一覽詎能歷覩職居關無一事不做無寸長不錄武備漸脩軍民安堵藉使奸宄潛消內患不作即強奴窺犯自足支持少俟數月便可轉弱爲強徐圖退步何事流言廣布聽睹混淆若有呼吸難支之狀遂生憂危憤懣之談職即識量未優同事諸臣亦何可坐觀成敗且一將之用必諮訪于司道一將之革必揭報于司道司道以爲賢而不用者何人。以爲不賢而用者何人。經畧總其事權監軍分其

責任監軍有申文停閣罪在經臣。職無越宿不發之
批詳監軍有籌畫相左罪在經臣。職無強執不諧之
意見關上之兵有浙營有湖營有川營有騎兵營有
水兵營有哨探營有火器營營各有將兵各有伍惟
是入關敗殘之兵及各邊剩存之兵零星雜湊職于
六月初二日行牌道鎮合併成營且將標下家丁暨
各道諸將家丁悉付總兵江應詔編成隊伍操練兵
革之事悉以委之各營操練教習技藝某營逢三某
營逢六某營逢九據山海道印揭開報甚明一不操
而職即行提各營將領查究矣練兵與脩築各不相

妨非因築鑿頓忘訓練也。乃新邊估計悉由部道去者不可問矣。今猶有二贊畫一監司在焉。職據原詳題請職名可查。彼時質之衆議如以爲可已。職曷爲不已。如以爲可減。職曷爲不減。工部覆准之後。司道築土興工。絕無異同。今工甫興而議止。職奉旨召還。而帑金始至。職得超然免于評論。則職之幸也。然而關無重扃之固。依山靠嶺有憑陵之勢。非國之福也。大抵山海事情。做一事則生一議。議本同而故異之。理本合而故岐之。皆緣遊說棍徒巧託叢神奸藏兔窟以冒糧爲得計。以聽用爲真官。黃傘滿

街金聲耀日未遂負緣。逐生怨謗。每懷擠軋。敢肆譏
嘲。只云將不簡兵。不練以一二年前之舊話。直串到
今。又云用逃官用逃將。以十數萬人之罪。案徂成一
片。致令黑白混亂。頓成口舌戰場。俾任事精芒。陰銷
陽鏢。飛塵翳天。浮雲蔽日。覆轍相尋。流禍何時而已。
耶。關臣疏稱異路同舟。眼前得難呼應。一片戾氣塞
被山海。自有遼事以來。無處不然。無時不然。氣運所
關。真是異也。若論眼前真光景。只是兵勢未強。人心
不固。然三敗之餘。理勢必至。廣寧潰後。原未嘗招兵
募卒。安所得精兵銳卒而用之。此當以徐挽而未可

旋圖目下原無可戰言戰者不過虛虛提情竅之神
情遠遠布恢弘之着數非決計進攻非立地進攻而
人遂疑之疑則生駭駭則思竄故目下之人情不似
往昔之人情今日開章大義須以安人心爲主而練
兵繕器械次之脩堞造房次之積草儲糧次之興屯播
穀次之恤流離禁虛冒次之心思在恢復祖宗之
故疆而寔事在嚴謹關門之斥堠要見出屯關外正
以嚴守關門而今之嚴守關門即爲他日出關進取
之地輪攻墨守作用相須而自勝勝人原非兩事若
見山海小小巖安以爲可戰而忘守則非言戰之指

職寧受才力不及之名。不敢以封疆爲嘗試。職從受事。至今案牘充楹。悉心料理。收復破壞之封疆。安插殘敗之兵馬。完全交割。並無缺欠。若以半載之辛勤。而留將來之罪案。功成既無可紀。事敗則有所歸。職雖愚。不敢受職。身將隱矣。存此疏。以待公論之定。只恐公論定而國事不可爲耳。

先是奴酋托西虜根根兒通稟乞和。晉甚惡和字。語之曰。當乞降降。則還我遼東土地人民及諸叛臣。乃題請。不則惟有勦耳。揭達閣部不敢聞。乃奴中叛臣阻之事。遂寢。比袁崇煥爲督師于御。

前力任五年減奴且矢誓焉後知奴不能即減乃陰許奴和有通官叅將張定者進京至兵部與奴講款余時爲本兵立叱之知余之不可給也崇煥乃致語冢宰王公射斗曰要邊上做事須易本兵王公密告余旋圖避路而奸黨構謀借惠安勅書事侍御吳玉與余爲難矣余歸而崇煥得信心行事中奴之誘先殺毛文龍除奴肘腋之患已已虜遂從薊鎮深入薄都城舍山海而以薊宣爲屢犯之孔道向使崇煥不使吊通奴西夷必不叛夷不叛則西路不可行不殺島帥則奴顧巢穴必不

敢長驅而不犯此雖崇煥之賈禍亦由中樞把握之無人也

王在晉題職讀史至於秦伐趙廉頗堅壁不出趙王以爲怯數讓之應侯得行其反間而趙遂危未嘗不廢書而歎也夫兵何常之有兵可進宜強兵不可進宜怯昔清撫之敗起於輕敵三路之敗起於輕進廣寧之敗起於輕挑輕之一字遂以亡遼然清撫敗猶有遼瀋遼瀋敗猶有廣寧廣寧敗只有山海此山海者二百五十年之宗社攸關非可輕於一擲者職非怯敵者也怯敵則出都之日必請多兵自衛

徘徊瞻顧而不敢行矣。書生未聞軍旅然職始爲僉
事兼攝沿海四道與倭戰于海獲功陞級受 欽賚
歷遊楚浙無非兵事甚矣兵之未可輕言也諸葛亮
見知於昭烈知其謹慎遂寄以大事而所以知其謹
慎者以亮不遺於細事而始知其可受大事也職屬
袁崇煥膽魄稱雄志力並矯且其澡滌之襟期光明
之心事迥迥逸羣職心重之愛之及崇煥嘗對職曰
我不惜命職應之曰性命與封疆孰重職令其往前
屯安插遼民四鼓入城夜行於荆棘蒙茸虎狼潛伏
之地職未嘗不壯其氣而深虞其輕進也勇如賈復

光武以復深入希令遠征帝自從之故少方面之勲
彼時名將如雲而光武鄭重如此今如崇煥者有幾
哉職嘗與主事沈蔡言今歲宜力脩戰具俟氣力全
甲兵備糧糗足明年伺奴之隙疾趨廣寧則廣寧可
襲也。然。必。有。復。全。遼。之。力。量。而。後。可。復。廣。寧。必。有。滅。
奴。之。力。量。而。後。可。復。全。遼。不。然。雖。得。之。必。失。之。啓。無
已。之。爭。遺。不。了。之。局。而。竭。難。繼。之。供。故。職。之。亟。亟。守
關。者。非。以。關。門。自。畫。也。如。以。關。門。自。畫。則。三。十。五。里
之。中。前。七。十。里。之。前。屯。二。百。里。外。之。覺。華。島。職。不。發
兵。守。之。矣。然。職。雖。發。兵。關。外。而。所。憂。更。有。甚。焉。者。中

前所城落於崇岡之下登高而窺大如一掬中有頽垣敗壁耳虜如大至兵力不支必奔潰奔至八里鋪小而不能容奔入三道關險而不易上此兵安歸乎勢將扣關而關不敢開也此一可憂前屯城郭不完居舍未備糧糗告訕甲仗全無遼人中可選兵三千袁崇煥欲領兵居之合所部可共得兵七千欲駐兵不得不急脩繕急脩繕不得不緩訓練以烏合之衆居狼狽之鄉居平且難存活遇變何以自持此二可憂覺華島距岸二十里水堅可渡島無薪乏水旣欲運米又欲運薪島中房屋甚稀風雨無可遮身雪霜

必至砭骨人盡言宜夏而不宜冬宜舟師而不宜屯
戍。遼人有乘桴泛海之苦。逃將有聞風凌霄之志。此
三可憂。十三站等處之民歸矣。大凌河水乾。逃歸者
必踵繼。奴中奸宄定竄入其中。我既不容進。關而關
中消息自當透露。窺我之虛。乘我之瑕。一刻未可弛
防。四時皆當嚴備。此四可憂。各屯遼民初盡降。奴皆
已削髮。祇緣折其妻子。離其骨肉。遂各登山據險。逃
命萬一。奴中少寬法令。勾引招來。當此衣單食詘之
時。孰無戀土懷歸之想。此五可憂。前屯安插自米鹽
鍋竈葦蓆碗瓢之類。丁鐵磚灰木植器用之類。靡不

自關中買運至於銃砲火藥甲仗弓箭一時何能湊
辦。竭關中之力以供萬人之用。索取甚煩。勢虞不繼。
此六可憂。關內遼民久已安心避難。今聞中前前屯
選兵給餉。內之貧寒者思出外之狡黠者思入。縱之
出則以中土不能賑恤。每欲化而爲夷。縱之入則
內地何可收容。勢必釀成隱患。此七可憂。奴之不輕
突犯緣向來嚴拿奸細。凡過八里堡即擒治。守帳夷
人亦時時獲奸報効。今由關門以及前屯爲人跡通
行之路矣。職雖諄諭守將盤詰。然人多易混。路遠難
稽。遊之乎無何有之鄉。聽之乎不可問之地。彼之間

謀得行而我之防維漸解矣。此八可憂。遼民入關向
多失所欲。樹之兵則無餉之可給。欲離其黨則無策
之可驅。廟議重於誅逃。凡逃將逃兵。人人解體。魚
避網而恐。至於無魚。鳥避繒而恐。至於無鳥。風急枝
搖。人心愈動。此九可憂。海內邪說浸淫。群妖疊見。東
省殺人如麻。血流成渠。而畿內中州。狡焉思逞。一
呼百聚。勢成瓦解。萬一關門少有挫折。則中外震
撼。遐邇離披。顧此遺彼。何能收拾。此十可憂。職任抱
關。如身居敝艦。日懼沈淪。手捧漏卮。心勤補塞。職之
自視。智勇已竭。尋往其兢兢。人之視職。作用未恢。似

隣於泄泄。此任事之難。而喙長三尺。不能向通。國
之人。一一自鳴其苦衷也。嗟乎。都城今日之安。誰
實貽之。去帷之婦。恥談家事。然終不敢忘。陛下
臨軒授劍之。恩。遂多饒舌。職自此可無言矣。奉
聖旨。邊關事宜。慎重覽奏。具見老成長慮。知道了。
王在晉題。國家財力。東西支應。萬分無措。典兵者
不恤司農之苦。司農不得已。必不恤百姓之苦。向來
用二用三。今且加編加役。邦本日瘁。國勢難支。職
滋懼焉。人知經費之匱。耗於兵。而不知其耗於官。職
到關。曾裁去冗官四百餘員矣。此四百餘員者。皆遊

食寄名毫無益於兵事而大爲治兵之害者也數月以來雖多憎惡之聲實消嚙囁之費然細查兵冊有兵不滿千而設把總數員者有兵僅數十而設中軍哨把者既名爲官手不習戈矛身不任力役目兵歸其領攝公私任其科歛且出入乘馬官爲給料此銷兵之兎窟而耗餉之蠶叢也官一名食廩比兵糧二三名又占役五六名守備千總占役十二名自非立定規格計清汰冗員濫食何可勝算通計在關三部及南水營北山營并各標下通共應留守備千把總等官四百九十六員名應葉守備千把總等官四

百二十三員其年力精強可備驅使者仍留在伍支
食兵糧不許支廩職以去事之身不辭任怨任詢爲
朝廷以清兵食行伍爲之肅清藉令九邊各鎮悉照
此法一歲間裁節兵餉不知幾許去其蠹兵者而兵
自壯去其靡餉者而餉自豐此今日養兵戡亂大緊
要處挈其要而圖之主計者不蹙額而愁懸罄矣
經畧王在晉恭報虎首受款併陳塞外夷情以嚴防
範事照得西虜以慙爲主慙之順逆西虜所視爲向
背亦東夷所視爲重輕故講賞惟慙之費鉅而主款
惟慙之撫難當慙使初來越三日而通官始與之見

以少折其無然之氣。貴者虎酋之倖臣。而其人則桀驚其言。則滑稽其舉。動則貴重而不與諸名王狎。奉憨之令。先索去年秋賞。併今年春秋二賞。臣思輕予則多索。始不慎則終必濫觴。使通官告之曰。廣寧爲受賞之地。廣寧失。何以賞爲。去年誑萬金而虜部未聞大至。以致廣寧沒。憨實誤我。何以賞爲。我兵當關數十萬。尚欲殺奴。何有西虜。不款有戰耳。何以賞爲。如此者。往復論折虜。不能難。卽一季之賞。臣亦未許。而通使委曲調劑。僅與今年秋賞。以寓羈縻之意。而貴英恰復索往歲王猷之賞。而臣復諭之曰。猷

何在其誰與賞。又索王巡撫收過進馬一百六十六匹之價。而臣復諭之曰。馬何在其誰與價。酋使語塞。而始就盟。八月十三日。令山海道關鳴泰關外道袁崇煥同撫夷官李增等出關。俾令閉刀插血。立有盟詞。願助兵滅奴。併力恢復。天朝疆土。若奴兵到。愁兵不到。斷革舊賞。倘奴酋通賂背盟。陰合。罹顯罰。蓋指天爲証矣。然而夷之狡。不可御也。夷之貪。未可厭也。姑與之。而深裁之。虞其有後請也。是舉也。副將王牧民先約朱梅張定喇嘛王桑吉。以曦自爲盟。而後與虜盟。所以通官無所刺謬于其間。而浮費絕。浮議

亦絕牧民老且病無子心真爲

國口枯舌敝千迴

百折而款乃成其寃連食費段疋等件所費不數萬
蓋以來人之多寡爲盈縮來少則食費少臣不欲其
多來而先使人力拒之故費省奴聞之延頸縮首畏
慙之助我足欲動而次且矣臣欲完賞事而聞 召

還之

命恐夷情冲變立趣督臣王象乾來會閣臣

孫承宗督關之

命亦下臣令通使少候二大臣至

給賞而貴英恰等不能待也臣稍稍與之而徐徐給

之此外又有錦州大康堡開元鎮安堡之賞屬廣寧

興永縣高臺堡之賞屬寧前奴友青雖係慙族而不

與慙同賞然其費有數不若慙之費矣鎮安即宰賽而聞抄花亦願來受款蓋抄花切近于奴奴動抄花必先知之也奴地距關三百里若不結西虜必不敢深入故今日以款虜爲急着而謂其不當款者虞其費之奢也費不奢而入我之戎索恐舉朝亦不以爲迂矣然西虜雖款而其間隱隱必至之情有足虞者抽扣爲虜中最悍與拱兔友青爲一黨抽扣當設盟之日不肯受約曰慙即受一季賞我必要三季賞慙使不敢爭而抽扣代之爭其攘臂爲八大部先即強使之開刀而其心終未已也可虞者一先是督臣

遣使至反青拱免所適與奴使會群食于帳中奴使
讓我人先食是我欲勾虜奴亦勾虜我之歲賞不能
勝奴之多金虜畏其威而更懷其利念或他岐而交
或不固可虞者二。慙貪我之歲賞見我拒之力姑與
姑就。然去歲廣寧進馬寔未償價而諸部爲之撥置
藉慙爲牆壁恐前闕思補而後求且繼虜盟雖訂未
必甘心。三。秋季之賞可虞者三。虜雖狡朴野無文而
今則番揭番語皆通文理用遼人爲主謀虜無別情
而遼人教唆化無情爲有情今朵顏諸部亦漸生需
索昭明信于犬羊責寒盟于羶貊難爲久要不志之

事可虞者四。哈喇慎白顏台吉原非薊鎮之虜。乃罕
孛羅勢窺我之弱。率衆要挾。初心不善。比其亡也。厥
部借助兵之名。以索臨邊之賞。夫臨邊止數百騎耳。
此數百騎者。烏足勦奴。而先索賞其來也。爲賞而非
爲助兵也。助不可常。而賞遂爲例。臣峻拒不與。究必
生倪。啓漸可虞者五。初五路頭目妻子被貴英哈所
占。頭目負債投紗花。紗花不能養投奴酋。奴酋用之
守廣寧。而以真夷雜之。頃奴中聞我圖恢復。遂盡遷
五路投降之虜于海蓋間。而悉用真夷渡河以居。守
萬一用投降之虜相混。我以爲款虜也。而不知其爲

降虜也。我能用計以餌投降之虜，可布機略于彼腹心之間。奴如用計以混受款之虜，亦能與禍患于我肘腋之地。可虞者六款之可虞如此。故款虜者，羈縻之術也。戰守者，自強之策也。用虜者，通變之權也。自強者，制勝之經也。臣今解任矣，籌邊滅虜，廟謨自有定筭。至于竣虎酋之賞，併叙文武效勞諸臣閣部督撫大臣當竟成之。臣可藉手以寬聖明之東顧矣。奉

聖旨：西虜受款，知卿控虜有方，其効勞文武各官統候事竣錄叙。

內閣沈公書畧云正月之潰湧關而入者至二百餘萬其爲民爲兵爲奸爲歹爲奴奸細皆不可知每念凜凜今幸而無大譁而西虜且爲我防護藩籬而我可徐圖自固之策此功不細矣扶老携幼面見那顏距躍曲踊年兄此舉即汾陽單騎見虜何殊焉虎酋若來欲駐寧遠則奴未必與爭地舊賞雖腆自不可減惟當機裁酌此中無不照應也經畧王在晉題臣在關臣不惟百用樽節即以兵糧計之向以七十日而費銀七十餘萬今合九十日費銀五十萬是三閱月而臣所省已四十萬矣以一年

計之所省不一百六十萬乎。臣無他能而爲。皇上
惜財力。借民力。惜物力。半戴間。不聞調募。追呼而獵
殫其精力。整頓破壁頽垣。殘兵敗卒。四顧瘡痍。漸有
起色。留其餘以備東省。川湖雲貴之用。夙夜靡遑。盟
心以報。聖主殊常之遇。自有東事。惟臣爲獨完。意
亦蒼蒼之衣。其能昭鑒乎。除臣造冊送督理閣臣及
新撫臣存照。備查外。理合奏聞。奉

聖旨覽奏具見。節省知道了。該部知道。

經畧王在晉題職叨。聖恩授以經畧重任。拜表即
行拮据受事。於時身披草莽。躬歷沙場。十萬奔潰之

餘人無固志。三番戰敗之卒盡爾銷寇職。一切調停。多方布置。日行事件。衙門既無卷案。承行又乏吏書。僕隸爲徒楮筆共事。凡封章上聞。邊情入告。羽書傷午。靡不親自削牘。手腕欲脫。關門撫夷來非一部。講非一事。拒之則勢不格。予之則欲無厭。日日談兵。相商禦侮之方略。刻刻憂虜詎忘恢復之遠圖。以至遼民絡繹入關。盡人必由親審。戌卒辛勞守塞。何時不用隄防。蓋所值爲最難。最窘之時。而所處又至危。至險之地。恩猶未報。夢懷山海以長驅。臣本致身生入玉關爲厚幸。有繼職而至者。事爲有諸端。亦可。

尋倘能悉慮精心自可隨事見効。至于文武二途例
宜有薦疏第在關共事多由河西奔入蓋自廣寧陷
後原未銓除更換而見用武職皆由兵部覆擬或更
調以勵後功或降處以期新効其中儘有才勇可錄
而彼時未經領兵未有地方之責是以與衆同奔有
難暨論古來識于城于二卯釋檻車于屢敗時當用
人何可盡弃倘欲盡弃必兵部另選一番名將如此
大敵須得戰將百員目前何能得百人以充任使乎
文官如在關府佐勤苦異常才識儘練心惕危關誰
人有戀官之志職固勉之而使留非去之而不欲也

泥一逃字則俸深任久者悉不敢薦若舍終日相與之人而薦遠方兼轄之職則借公牘以樹私交職有所不敢矣是以併部屬方面之多賢悉聽于朝議之採訪職自揣無知人之識所不敢居于薦賢之義亦薄劣所宜然耳

揭開一脩理中前所城郭委叅將周守廉遊擊左輔領兵戍守兼管哨探○一救渡義州等處遼民一萬一千六百一十七人續救四十三人住居前屯衛委副將趙率教遊擊魯之由脩葺城垣挑選遼人爲兵使之居守嗣後有遼民回鄉者俱發前屯不許進關

○一覺華島切近寧遠發水兵二千一百六十一名
委遊擊金冠等守之又委叅將祖天壽選遼兵二千
名屯劄○一寧遠距關頗遠勢孤難守乃令左輔周
守廉領遊兵更番迭往巡守哨至松山時通間諜計
殺孫得功復關外地方三百里五城二十七堡俱歸
版圖○一鐵場堡去關四十里城堡頽殘房屋燒燬
並無一人居住本年六月親至其地見山圍合抱逼
近西虜凡打柴伐木刈草取足于此係山海樵採之
區不可輕棄已委竇承功經理因虎酋夷使畢集本
官協管撫賞另議委官尚未就緒○一虎墩兔差貴

英恰等百餘人及拱兔等入大營到關講賞盡力裁
抑今已聞刀說誓情願助兵○一朶顏三十六家及
薊鎮諸虜俱已受款設帳守邊○一反青等部與奴
私約婚姻今悉勾致受賞不復爲異○一抽扣兒打
喇明暗王燒餅等虜向甘作賊不願受款今在邊有
犯每令守邊夷人擒捕賊首受罰搶刼漸稀○一兵
馬分南北中三部守內城守羅城守邊城守北山守
海口守中前所守前屯衛守覺華島守沿城犬砲守
水旱關銃臺鼓樓又有遊兵哨兵墩臺兵關外遼兵
關外駐防兵關外擺空營兵各邊駐防兵各門擺圍

兵邊內脩工兵各局官兵匠役標下及各道鎮家丁俱編入行伍一體操練○一東省白蓮教攻陷城池留山海班軍一萬二千防守又調閩兵三千廣兵三千淮兵八千助勦妖黨悉平○一守邊守城兵習銃彈在營在伍兵習槍棍等器北兵習弓馬南兵習牌筌各營逢三逢六逢九操練各有定期○一南北二部邊城長十六里原高三丈四五尺不等今接高五六尺共高四丈土築裏口收頂共寬三丈二尺自根至頂高三丈五尺用方磚墁頂二層築完裏口漸次加垛未派脩者南部四百二十丈六尺北部六十七

丈八尺俱有舊城可守但未加飾增高○一住城脩完裏口三百九十七丈○一羅城接高七八尺不等共高三丈脩完主百五十八丈九尺將完一十一丈五尺未脩者六十四丈六尺見派班軍脩築○一八里舖議築新邊一以護衛關門一則借脩築以工食賑濟流民今議停止祇築完土邊二百三十丈未築高者二百二十丈擬圍成土邊劄兵防守○一沿邊城濠俱已挑濬○一關外烽臺俱委總兵李秉誠撥軍匠脩理○一城外擺設地雷火炮城上擺設灰瓶擣石大斧銃砲等件飛石木架總兵江應詔見在製

造濠外品字溝挑掘未完○一大雨摧倒城墻兼工
併作俱已脩完但于八月二十五日移駐撫寧候代
傳報羅城東面倒十七丈○一實在米二十四萬八
千九百四十五石零豆二十三萬二千六百八十八
石零高糧小麥九千三百一十石零俱收貯囤積○
一前屯衛二次發米六千石○一覺華島二次發米
二千五百石○一向來本色米各軍不願支領以致
米糧堆積右屯覺華島等處浥爛散失今俱按月本
折兼支○一覺華島向委通判吳士科看守米豆救
渡遼人陸續渡過官生士民五千三百一十一員名

每官生一名給銀三錢百姓一名給銀一錢俱發樂
亭昌黎天津等處安插○一回鄉人口進關查係某
省人氏遞解回籍沿途每縣驛各給米一升如係遼
人押發所屬州縣州縣俱經親審察其面貌審其言
語酌量遠近照前給米進關者甚衆不可勝紀○一
前屯衛發官丁屯劄後凡係回鄉遼人俱不許進關
每人給米一斗解發前屯若係與省人氏照前入關
遞解○一各船有失風濕米存則給發遼東避難生
員濟飢○一各營兵數向多虛冒于五月間分爲十
六路查點除去虛兵九千一百七十一名又汰革掛

名冗匠二千三百餘名川湖兵老弱者漸次汰歸○
一各營食廩官太濫汰去官四百餘員止存八百六
十七員近又立定規格兵若干立中軍千把總一員
復革去守備千把總等官四百二十三員○一驛遞
煩苦經略標下承差舍人向設六十四名悉革去不
用○一聽用各官實授與給劄加銜一槩混支部院
之劄與鎮道同以致錢糧冒濫今俱分別實授名色
給劄者查某衙門劄付各分差等以定廩糧數目○
一毛文龍在朝鮮三次差官渡海獎勞二次移咨朝
鮮國令助兵屢疏催閩兵淮兵應援○一催天津運

米料一十一萬七百九十二石戶部解發銀五萬兩
又天津買布二萬疋大弓二百張大箭二千枝腰刀
五百口三眼鎗攢竹鎗各五百桿火藥二千斤接濟
朝鮮軍兵○一招安祖天壽領兵防守○一向來糧
銀俱發各營將官分散致有扣減等弊今俱鑒完包
封解驗秤准給發○一覺華島載回馬騾牛驢四百
二匹頭銅七萬斤生鐵二百五十九塊鉛一百三十
四大塊銅鐵槍砲九十四位件桐油六簍鐵錘一百
六口車一十四輛○一覺華島載回米豆三萬五百
五十六石五斗新建遼船二十四隻接渡遼民○一

山海將官如分守三部守各邊撫夷哨探皆因材器
使近來堪任之將皆被妒口擠排致令彈射然能勝
戰陳者尚有十餘員○一永平所屬向因造作搬運
採辦調募不勝疲累自抵任以來並無一事騷擾止
運煤稍艱今又移局開平就煤打造民間不知軍興
之苦○一三月間抵關景色蕭條四民奔竄今因西
虜受款客兵無擾商賈畢集繁盛如都會雖酒食店
頗多然因蓆舍中難容鍋竈不得不從客兵之便也
○一湖兵四卡結隊私逃追回原伍斬爲首五人細
責四人黨惡三百餘人悉行驅逐○一參劾大將寶

承武達其勳孫顯祖三員裨將保世寧袁應兆陳愚
直孟淑孔四員分別逮處○一參劾管關同知張文
達一員訪拏開廳弊役十餘人○一拏問不奉軍令
私自招兵聚衆棍徒鄧子龍周良馭鄧金勝陳光祖
李世卿金文進等解散三四千人○一訪拏奸細夏
時疆等王應龍釋化遠傳有功王正邦等五案○一
題准發銀十五萬差官往宣大選買馬匹○一浙
兵營蓋造官房軍器火藥庫糧儲倉連營房六百一
十二間○一右掖管備完木料土坯蔴蓆等件已經
興工蓋造營房三百間○一南部脩完雨淋舖房三

十九間○一北部造完舖房三十七間沿城下造完
舖房三百四十三間○一爲建造營房缺少木植牌
行總兵江應詔各營撥發軍兵出口共採辦過檁椽
山角柱木植共四萬五千七百一十八根○一本關
議養馬二萬匹歲計召買草八百萬束向無草場今
實得居民穆齊斗地一十一畝房三間李倉地一畝
二分楊啓泰地八畝翟自明地一段房三間孫好美
田地一十一畝四分郭從明地一畝六分李丙明地
二畝二分分建草場廠三處週圍牆垣五百一十丈
每廠大門一座廳房一座俱給價興工○一條理南

局作房八十四間○一郭家園蓋火藥局廠房十七間○一龍王廟蓋火藥局廠房十三間○一新建北火藥局開工伊始止先造完房九間○一石門三官廟局造房三十二間○一石門教場局造房二十五間○一石門盛甲局造廠房七間○一造火藥庫房一百間○一造成綿紙盛甲一千五百九十頂副○一造鐵盔甲腦包二千三百八十六頂副○一行山西造甲一萬副○一造火藥一十四萬二千八百八十五斤十二兩○一造火線一十二萬四百四十條○一造成戰箭一萬一千六十枝○一造戰車六百

零三輛○一發銀撫寧縣造車四百輛○一造火箭
七千一百五十枝○一鉛彈共二十七萬八千六百
七十七斤○一造大將軍三將軍百子大銃木母神
飛將軍威遠砲馬砲天武神威將軍鐵神飛將軍滅
虜砲木發煩木炸砲隨母子砲追風銃三眼鎗鐵板
斧鳥銃長刀腰刀長鎗月斧刺馬鈎鏹釵斬馬刀尖
鏹斧鐵鑲地釘釘板鐵葉鑄鐵鉗鏹刀鐵鉞鐵鏹牆
捩子鋸牆板木夯等各具數目○一提淨硝黃十五
萬觔

王在晉改南京兵部尚書大學士孫承宗督師山海

內閣葉公書畧云自有夷難以來封疆之吏無一
得善其去臺下不避難不誤事真可謂完名全節
而至與我相左者乃所以相成矣獨惜功已有緒
廢于半途有志未竟于尊懷不無耿耿亦 朝論
之所共歎也○韓公書畧云向者金遼淪失台臺
一身肩承而蒞事以來調行便宜次第奏效凱陽
還闕殊有深念初擬還部以凱陽新命仍令改擬
台丈名實不虧進退有道目前善後事宜安危所
關慎勿避嫌正見急公耳○史公書畧云神京所
託重僅一線巖關 廷推材力之選至再三而不

敢拜 命獨門下毅然仔肩無幾微見顏色其氣
已蓋天下而聲足震醜夷矣抵關以來民狎其居
虜維其喙夫莫非門下底定之力若乃仗劒而出
揚旌而入即今之甚有口竟無能加于廝養之毫
毛此又從前疆理之臣所絕無而僅見者不肖且
藉爲同籍寵光而翁亦差足自慰矣

原任經畧今改南京兵部尚書王在晉奏臣素稟孱
弱五年以來實爲遼事焦心如燔昔在東省計竭于
防邊力窮于飛輓蓋自庚申正月臣得頭風之疾百
藥未能調愈也嗣復總理工部爲自古未設之官獨

力難兼之事而匪蚤暮以圖報効俾米粟如山甲仗
成阜乃心傷往事盡歸于浩歎矣今年發憤賈勇往
而當關孰知怒螳終壓于車輪而井蛙僅窺乎湫窟
痴心任事而來傷掣之桫榆銳意前驅而成半塗之
限畫志氣旣灰于邁往病魔遂至于牽纏左臂漸歸
不仁濕熱竟成皮漏肩背頓添臃腫血疾更帶腸風
兼之胸膈飽盈每食必嘔精神耗盡徹夜常醒蓋以
年來治事之困憊甚而今歲抱關之憂瘁愁日增一
日則病日深一日馬牛有力竭之時而金石有精銷
之日南兵何任以病夫正席其間官必曠鰥事將叢

善

挫臣之所爲跼蹐而不能以自命者也伏惟 皇上
俯念勞臣深憐病苦俾遂乞骸之 請獲就歸田之
賦則 恩義兼成 生成加篤擊壤以頌 堯年而
三十年來許 國之身得自全其頂踵矣奉
聖旨卿當東事危急署部行邊勞苦中外畱樞新簡
乃連章控陳情詞懇激特體勞臣雅志准暫回籍以
需召用該部知道

卷之三 說名歸

樞輔孫凱陽行邊詢之同事凡言不可戰者必斥
監軍耶慎言寧前道張應吾副叅吳自勉毛有倫
別鎮皆以是而歸總兵江應詔則面叱而加之辱

晉矣。余言邊事如此三年後尚不可戰。此所以與
樞輔而相左也。孫元化獨倡驅遼人出關撥田耕
種之議。樞輔擊節歎賞。余謂種田必給耕牛穀種
造房築堡。且不能禁賊夷之竊取也。諸事未辦而
驅民與東西夷虜增數十萬之兵。乃樹敵耳。若不
東不西而聚于關外。解散無術。我必爰擇爲兵。遼
人非可用也。樞輔不以爲然。比督師更代。余尚在
永平。而遼人被逐之苦。不可勝言。老羸之轉溝壑
者過半矣。壯者叢集不散。挑選以充行伍。而又嚴
苛以督九邊。應調之卒。邊兵多散而爲盜行劫近

京地面關兵從此弱矣。勤王則欲入都城，援凌卒。至于召亂，勦寇則習于奔逃。王化貞、孫元化、袁崇煥之死，皆遼人誤之。熊經畧謂遼人之不可用者，乃灼見也。至于關外之田近而可耕，膏腴之土皆被遼官佔去，硤确寫遠者屬之遼人，遼人何嘗得耕耘之利，亦何曾減軍興之一二哉。

禮科張惟一云：榆關之外是處膏腴，及田彌望者，皆鎮將霸爲養廉，遠而硤者始爲軍屯，薄野荒蕪，小民始拚生而取利焉。必仍而不變屯種之利，在武弁而不在國矣。

乙丑十一月疏

十月大學士孫承宗題臣以至愚極陋仰荷 天恩
私自凜凜然誓與文武將吏同心戮力仰副 皇上
籌邊之盛心然而誠不能動才不能支以致天人示
儆災患頻仍蓋臣以九月初三日視事月未匝而悚
然爲之儆者三矣九月雷已收聲雨亦稀少正令兵
改建營房之日忽于廿二日雷電交作風雨晦冥而
雷更迅歷寅卯兩時始晴朗融和蓋當雷收聲之日
而奮尋常以爲不當雷而雷其戒淫威也臣思臣至
未敢爲威天或惡臣之尚循舊格而爲此昭昭也且
欲臣之兼惠於人而無爲此嗛嗛也蓋殘卒縱弛庸

流困窮兩俟恩威而臣又待罪輔弼其敢不雷動日
暄仰播 皇上雷霆不測之 恩威也臣用是日爲
凜凜不敢自安至次日午時復有聲如雷有煙如雲
偶起西城外當得江應詔報有丁守備與張愷試銃
于寺延燒大寺寺中舊貯兵器臣已令沈杜二主事
查明今諸物朱失獨遺火藥二萬斤一時盡毀火藥
有立火局而沈主事又新造一局此係造成尚未入
局者臣初聞疑有奸人爲謀再四審核供報相同而
張愷輩皆死于火藥之傷則其情果屬真也此則天
實厭臣之罪豈未決去城日聚十餘萬人一寺觀輒

有數百人兼以人情怠玩臣等每單馬巡行各相交
儆似有奮心而忽然遭此天變皆臣之大過也除巡
捕員役嚴行究處而臣更益凜凜焉至次日聞十三
山之報先有報來未確是日水兵遊擊金冠等報接
濟過十三山遼人三十四名口據難民口報奴酋自
八月十五日圍十三山至九月初六日山民被陷此
一事臣從七月間與督臣議于檀督臣許爲臣諭密
出兵三千防東西之患臣更欲從衆議以兵屯寧遠
稍近迎之以爲依而竟不能得今接之無多忽爲所
陷此中關係甚大甚遠臣用是益爲凜凜也夫百務

方興秋防正急天出雷電之儆臣何敢謂遠不可憑
而况軍之急需即秋毫不可捐而二萬捐殘于一炬
中原之赤子即予遺亦可憐而萬千遽敗于久圍此
其天心之愛轉爲嚴切人事之疎更屬惕勵除臣與
合鎮文武痛自脩省外伏念臣督理一方所關甚重
而臣輔臣也天人之變又不專于一方也懇乞大奮
乾剛嚴核邊政立罷疎庸之臣以謝天人之儆臣
可勝悚懼待命之至

強奴所畏者火藥也火藥焚燒我失禦奴之具矣
說者謂關撫領銀設局置造火器破冒實多故付

之一炬了不可問矯誣天變是耶非耶十三山負
固之民晉接濟渡海收集覺華及前屯者甚衆今
閣臣坐視不救彼失其援以死殉之我失其衛乃
生棄之向使經臣不易十三站之民雖至今存可
也嗚呼數萬之民一朝屠僇長平之慘豈過是耶
殺運未終逃生路絕田橫之客今猶有生氣矣
左都御史鄒元標奏 國家大事惟在憂虜策虜者
何慮數千百人以臣愚見視定守之一局夫粟不過
數萬車而帶甲不滿數十萬者未易言恢復也即恢
復矣其誰與守 陛下無輕信諸人急恢復也臣嘗

思遼之失始于李成梁成梁封伯遼之諸人各有雄心輒殺熟夷上首功家家萬戶侯者然酋不解之仇尤于殺其祖父故今稱戈不已次壞于高淮淮在遼東地皮欲穿人人思亂而遼遂不可支矣三壞于鎮臣往者遼才而畀近半皆門生故吏無敢死之卒而諸鎮臣自囊人參貂皮外別無奇策惟聽李成梁鼻息以取功名而以全遼畀奴酋矣今言之可爲豎髮陛下豈盡知乎

平東總兵楊肇基塘報照得賊首徐鴻儒自鄆城發難鄆滕嶧三縣相繼陷沒本鎮荷撫院二院會題督

勦隨同兗東道徐從治于六月初力日發兵十一日
恢復嶧縣解剡城曲阜之圍遂次師兗府七月初七
日奉部院同監軍道王從義徐從治誓師大會與諸
將戮力同心勦平三夏店紀王城嶧山等處勦穴續
天津監軍道來斯行統領援兵七千餘名至相與復
滕城平錫山救豐沛殲餘氛計大小三十餘戰俱經
塘報訖鄒縣圍久未下職自錫山旋師賊大怖賊首
僞都督侯五僞總兵兵魏七等據城乞降拔去旗幟
柰徐鴻儒狡計百出高尚賓毆陽德鄧九叙許道清
等三百餘人復行死守本鎮與諸將分地督攻衆賊

慌懼始擁鴻儒出城就擒馳獻軍門本鎮同三監軍
點名給票于十四五日安插各州縣之民十六日安
插鄒縣在城在鄉之民共二萬七千餘名造冊呈報
收過馬騾器仗等項俱經縣官驗明收貯城中百姓
俱焚香結彩迎新縣官反側之地復見漢官威儀賊
首徐鴻儒等皆械繫府獄真所謂殲厥渠魁脅從罔
治亂萌塞而 皇仁廣矣

巡撫趙彥題白蓮妖孽糾衆倡亂僭號改元一舉而
陷鄆城再舉而陷鄒滕嶧縣雷焰薰天南北梗塞元
兇徐鴻儒始稱雄于梁家樓爲我兵所敗逸過河東

繼竊據于紀王城又爲我兵所敗逃入鄒縣結納死士五千人廣布走馬數百匹群賊效死善能守城我兵多傷故攻取鄒縣三月之久者以此賊爲之祟也今妖氛已靖城池已復殘賊之逸入齊豐者又復追勦無遺而隣封之北直河南并無一賊之擾征討之局已完矣

南兵科袁玉佩爲天下有不容塗飾之功績臣子有不宜冒濫之寵榮懇乞 聖明于肅法誅罪之後再激冒功失事之實賞以快人心以重 國典以振邊疆叅兵部尚書趙彥冒功內云當東省初

告急時經臣王在晉見兵力單弱急調淮兵閩兵
廣兵與山海班軍以遏賊猖獗之勢權宜區畫業
經題疏後因經臣謝事趙彥叙功疏于登津撫臣
皆叙入內而節制統轄之經臣獨無一字叙及一
岡山首衝賊陣死戰重圍殺傷過多皆南兵之力
後南陽護漕生擒王繼芳大獲全勝亦皆南兵之
力而彥故分南北之見凡北兵功次陣亡俱叙恤
陞贈二三級南兵功次陣亡止陞贈一級或併不
恤不叙夫此又孰非故没人功以爲已功乎

乙丑九月

三法司會審修卜年流三千里杜茂劉一巘劉得功

等俱斬罪○竇承武擬斬達其勲等釋放立功革逃

任總兵薛來胤回衛聽勘○贈袁應泰兵部尚書給

與祭葬廕一子本衛正千戶世襲○贈彭象都督

僉事彭象周彭鯤翔彭天祐各都司僉事援遼一門戰歿

十一月御史梁之棟奏奢酋謀叛觀變于援遼發難

于重慶未出江門而何若海之輩幾倖有成撫臣徐

可求鎮臣王守忠催兵援遼爲王事也變起倉卒白

刃臨頭撫臣厲聲罵賊而死鎮臣義不就擒而死道

臣孫好古駱日升李維周監軍督餉亦爲王事也或

肝腦塗地義不反顧而死或引頸受刃赴難如飴而

死至如循良之章文炳死之日諭戒子弟以身翼之者數圍即逆酋叩頭膜拜尚有悔殺廉吏之言再如同知熊嗣光洪應科推官王三宅知縣段高選踪尸浮夷冠履枕籍再如兼督援兵臨陣戰歿者灌縣知縣左重也結連土司解厄成都者推官郭象儀也功尚未賞死更堪悲慷慨殺賊之楊愈茂尚責其輕進倘危城一解援兵從叙廬擊其歸路此時賊可就擒則愈茂之搗巢臣猶悲其尚晚耳鄉官董盡倫無城守封疆之責倡率義勇力捍孤城功已着于合州再救重慶身死逆賊之手即破格卹錄猶無足慰忠寬

其他先後與難大小將吏仰惟 勅部查照按臣原疏一併破格優恤其激勸人心非淺鮮矣

兵科林宗載疏云相臣孫承宗之始行邊也道路紛紛以相臣與閩鳴泰親以爲將易經畧而行耳此固妄想忖度之語未足遽信迨回 朝而果以閩鳴泰易王在晉也亦獨信綦真不爲偏黨者乎至慮鳴泰難獨任而不憚以龐眉皓首主張帷幄則慎重戰兢真得師中之吉矣庸衆可與樂成難與慮始即有元老壯猷雷霆積威直須一月三捷奴虜永不犯邊人始知其奇耶但今嚴冬沍寒防邊甲士衣無數重糧

無餘貯屋無長椽啼飢號寒之聲起而枕戈對敵之志灰即下令堅守榆關無戰勝之志守未必固相臣鼓舞自有餘恩無用以規爲慎也

御史劉廷宣疏云臣入都所聞大異有謂樞輔孫承宗居王在晉見成之功者夫有功可居自應首及政府次及大司馬而何必屈樞輔之尊于虎狼之穴也有謂私閭鳴泰葭莩之親者鳴泰資望不淺邊疆久著勞勛開府建牙自其應得彼即愚豈不能夤緣內地而顧兢兢于解經邦擽死不就之缺哉如此薦法尚可認作香火情深或者于山海累卵之危未及

深知耳知則不爲是言矣甚有倡被圍墮馬之說者
夢語耶醒語耶何山海之人不知而都中偏知之
耶此出忌者之口耶抑逃將逃兵畏其嚴明布此流
言耶臣竊恐奴酋之善用間也大抵絕無影響絕無
干涉此必出奸細無疑嗟嗟左袒在晉者不難含沙
相射而決非在晉之心在晉亦賢者也沉靜妥練自
是司農司空之妙選伏乞勅下大小臣工減省議
論勿輕傳布流言中奸細之暗間冷語相嘲微言點
綴致灰任事之心隳宗社之計一切更置文武將
吏令得軒然獨斷獨行勿從旁撓庶旌旗改色而膚

功可立奏矣

廷宣于遼事一味把持斥廷弼更督撫皆其調度其爲人堅僻強梗血性男子必不與之相合崇禎初年有薦舉懼貳暫署關門之疏言官大開遂無顏乞歸此真遼事之一大蠹也

御史練國事題臣聞理亂得失之故繫乎人才不知兵而強言兵可戰守而不能戰守則封疆之人非也不預爲措餉用人之計坐失乎是非刑賞之機則廟堂之人非也以遼事言之樞輔之制禦誠爲有方妖酋之窺伺者或裹足而不敢前然而未可恃也新

練之將士非經冲鋒破敵終未見其可用也樞輔原
不同于閫外之官已屢奉還閣之旨臣不知還閣
後此任可盡付之撫臣者乎抑當別議也夫能爲恢
復之人即能爲防守之人止于防守者恐并其守而
不足則不忍言矣今能爲恢復之人恢復之計將安
出乎祖宗百戰之封疆任其淪沒而不之恥几幸
山海旦夕之安忘其遠慮而不之籌未見廟堂之
有人也

孫公每以口說見功業此疏言將士非衝鋒破敵
未見可用恢復計將安出極中肯綮

十二月遼東巡撫閻鳴泰題自有東事以來我以堂
堂中國與么麼小醜相持五年矣成敗胡爲乎相懸
則兵馬之強弱使之強弱胡爲乎相懸則兵馬之虛
實使之虛實又胡爲乎相懸則法紀之嚴縱使之也
職拜命以來夙夜焦勞寢食俱廢兵馬虛實之數
營伍欺誑之習與夫左支右吾神出鬼沒不可方物
之情狀職夙習之痛之而豈異人任也于是先時布
令不憚力申遂督同鎮道列營南郊按冊逐隊一一
清查其最虛冒如遊擊宋鴻儒營者職爲之戮其一
哨官一百總一隊長復虛冒如都司田應宿營者職

爲之戮其一百總一隊長而禁令始行至餘將士之
細打僱役之梟耳不計焉自十月初六日起戴星出
入至十七日止共點過在關客兵宦軍四萬三千九
百一十員名馬七千二百七十二匹又點過山海鎮
山海路主兵官軍三千一百六十三員名馬八百九
十九匹又點過在關各局打造官匠一千八百二十
二員名尚有副總兵杜應魁并駐防一片石及前屯
中前所等處未點而職以多語傷氣多怒損心心氣
虛怯幾不能語不能食于是分委山海道臣袁崇煥
廣寧道臣萬有孚代出點之崇煥奉職令亦戮守備

莫大功營內私僱頂替者兩人至十二月十三日始竣事焉除革過不堪外通計關內外見在主客官兵匠役共六萬九千四百五十三員名馬一萬一千七百四十三匹或居關左或居關外調撥分防各有信地正經在關兵馬則職所自點之數並新招遼兵五千六百七十員名其的數也此外覺華島遊擊金冠水兵一千二百七十六員名叅將祖天壽遼兵八百七十五員名海水水結舟楫難通稍俟來春點之可也此職所謂選兵之實數也除職招募遼兵漸集漸練以實汰過空虛之額各邊應調兵馬容職續查續

請以備進取之用外頃者相臣所請擇以諸路官丁
一萬二千五百員名更祈 嚴旨督催俾星夜前來
以濟急需職地危責重思苦憂深寸腸百結不知所
云統祈 聖明裁察幸甚

關城斗大聚兵五六萬點兵之法劄營列隊畫地
站立同日同時委部司道府分行查點彼此不能
移動不能更替虛實纔見分明初六點至十七移
東就西左支右吾出神沒鬼何所不至遼人願充
兵者故粧精銳邊兵願回籍者假作疲癯汰去者
未必真老弱留用者未必真勇壯欲祛弊而弊乃

滋甚焉此關上虛兵耗餉之所自始也

大學士孫承宗題稱關城有兩總兵可當大敵而撫臣聞鳴泰與臣周旋久矣其才允堪大任此時臣宜東向登萊召大兵宣揚聲勢蓋賊來當在水堅之日而回在水泮之時水泮則必惧臣之到而臣已留沈有容着簡選水兵更移令天津撫臣李邦華登萊撫臣袁可立各多備水陸諸兵又檄招練道劉國縉備遼兵四千悉心操練備臣來春之用蓋登萊之聲勢不揚則東之鎮江爲孤而鮮人相倚力薄西之覺華島爲弱而關人獨當其衝故此行正西以守關而關

人或不欲臣去都人不欲臣來但恐臣一離開必謂臣懼春防而去然臣在此亦不過任此數將以殺賊而循臣之條理固自可爲臣與關臣將吏計皆謂當然蓋臣此身業已不顧安危不顧利害獨是兵機似應若此故敢及之而不敢必去以仰負皇上東顧憂勞懇乞聖明鑒臣愚款俯賜斟酌定不敢告艱告苦以虛聲爲實事使邊臣有不任事之人遂致有不得人之事也伏候聖裁施行兵部議覆孫承宗本奉

聖旨關事倚重輔臣朕知道了仍聽酌量行海防事

宜着天津登撫鎮官用心料理聽輔臣調度爾每即行文與他

閣臣到關料理數月便欲脫身登萊豈以建臬置郡便可了行邊實事耶疏云閭鳴泰允堪大任相與且久尚不能測其涯涘讀巡關諸臣之疏覺駟之難追矣

遼事實錄卷之十二終